

PARAMISI E DUYE MASHTEHO PHENYANGE

Isine khay, isine ekh rom, ekh romni hem uli len ekh chhay. Merla e romni. I chhay achhyola. I avzi, tase nay kon te dikhel lengoro choripe. O dadoro zhala te inkalel lenge maro, te han. I chhayori acchyola korkori. Na zhanla te kerel buki, na zhanla te kerel habe, na zhanla te thovel len. I shte-neshte o dat dikhela, phenela: „Ka piltserav man. Kaya chhayake mangela day“.

Lachhes, ama sluchinela pes, che day achhola lake kodoya, but zvero -mashteho day. Li la uli ekh chhay. E dadeske chhay – parni, a romneke chhay – kali, manafka. I o dat zhala hay ko buti, oy hay uzh dikhela. Pere dikhela, e mashtehone phagela dabendar. Na del la te hal, na thovel la. I chhayori zhala, rovela pes pe dadeske. O dat na pakyol la. I phenda:

– Bre-e-e, akana! Sar te keras, te mukav la akana? Ua asan mange e manusha. I shte-neshte, tryabva te ikerav la.

I romni phenela:

– Chhey – phenela – Kate haya ekh parche maro, ta vakyar te dadeske, chi marav tut, chi tormozinava tut! Ka lav tut I ka chhiyav tut andar o kher avre!

I chhayori beshela mirno – mashteho day si!

Lel pes ekh dives o rom zhala kashtenge. I romni phela leske:

– Shum mande akana! Ti chhay si but zveros, but pakyoschika. Na beshela pe thanes i an te kerav ekh bokolin. Palal e bokolin, palal e bokolin – mukla ko balkani, ko kari mukla. Oy ka arakhel po than.

I o dat te ne aravel o romnyake, leske romni veche, lel i kodoya bokolin e chhayake, pala lile o drom. Nema tele, nema dur. Davay, davay -ta but dur. I ov tarkulizela i bokoli i phela:

– Prasta, mi chhay, palal i bokoli!

Garavela pes i boki zhala tele, ando har. I chhay palal i boki. Zhala em kate ko pai, zhala hem te hal o maro. I nashaldili tar. Kay nashaldili o dat zhala peske lende I romni phenela:

– So? Muken la?

– Mukyom la.

A i chhayori ko balkani, ko vesh, kay achhili korkori rovela i phenela:

– Brey, akana kate te zhav?